



Акафист **равноапостольному Фотию,** **патриарху** **Константинопольскому**

Кондак 1

Яко премудрости благоцветнейший луг и церкви непоколебимое основание ублажаем тя, богодухновенне иерарше. Но яко исполненный просвещения Божественного Духа, и наша разумения просвети зовущих ти:

Радуйся, всемудре Фотие!

Икос 1

Ангел истинны, яко служитель премудрости показался еси, Фотие, богоявленне, и ангельским твоим гласом православия проповедуеши красоты. Сего ради светлости твоей дивящися, вопием:

Радуйся, имже Троица воспевается.

Радуйся, имже враг прогоняется.

Радуйся, церкви великий учителю.

Радуйся, благочестия риторе всемудрый.

Радуйся, уста боговещанная учений священных.

Радуйся, устне небогремящая догматов
благочестных.

Радуйся, яко обличаеши ереси крепце.

Радуйся, яко подъял еси гонения богумудренне.

Радуйся, славных мучеников единоправне.

Радуйся, благочестивых преподобных
сожительниче.

Радуйся, имже леть упразняется.

Радуйся, имже истина сияет.

Радуйся, всеумдре Фотие!

Кондак 2

Основание церкви апостольскою ревностию и
всяческою твоею премудростию показался еси,
Фотие чудне, еретиков низлагая беснования:
всех бо научаеши Святой Троице пети:
Аллилуиа.

Икос 2

Из рода изряднаго, яко плодоносный финикс
произшел еси волею Господнею, и плодам и
твоих добродетелей питаеши благочестивых

множества, Фотие священнейше, верно тебе,
отче, вопиющих:

Радуйся, прозябение цветущаго корене.

Радуйся, плоде честного земледелания.

Радуйся, родителей святых процветание.

Радуйся, жребия Божественнаго стяжание.

Радуйся, высоту неудобозримая знания
обильнаго.

Радуйся, глубину многославная благодати
явленная.

Радуйся, яко сияеши добродетелей лучами.

Радуйся, яко разжигаеши светом всяку тварь.

Радуйся, светильниче веры всесветлый.

Радуйся, звездо владычествующаго
неприступная.

Радуйся, премудрых учений изобилие.

Радуйся, честных дарований гусли.

Радуйся, всемудре Фотие!

Кондак 3

Славу земную призрел еси, мудре, во дворех царских пребывая, яко разума исполненный и всячески ко Христу взирая, от Негоже световодим, отче Фотие, взывал еси: Аллилуиа.

Икос 3

Возсия еси мудростию и светлым житильством, и ритор благочестия показался еси, отонудуже яко пастыреначальнику мудрому церкви, божественным благоволением пророчествованному, Фотие, взываем ти сице:

Радуйся, риторе благочестия.

Радуйся, уста истины.

Радуйся, церкви пастырю Богопроизведенный.

Радуйся, иерарше Христов Богодухновенный.

Радуйся, имя вседивное православных светильниче.

Радуйся, слышание многовещанное благочестивых утверждение.

Радуйся, яко иконоборцев разобличаеши заблуждение.

Радуйся, яко манихеев прогоняеши повреждение.

Радуйся, мудрый в словесех и деяниих.

Радуйся, многий в делех и благодеяниих.

Радуйся, душ очищай скверноту.

Радуйся, Божие к нам изъясляяй сострадание.

Радуйся, всемудре Фотие!

Кондак 4

Ревнитель показался еми Христовым апостолом во всем, священнейше отче. Сего ради свет Евангелия в болгарех верно проповедал еси, их же ко Христу привел еси, отче Фотие, зовущих: Аллилуиа.

Икос 4

Премудрость твоя святая и жития святого твоего свет богоглаголивый множайших приведе ко Христу, во во мраце ереси сидящих. Сего ради светлости твоей дивящися, взываем:

Радуйся, светильниче омраченных.

Радуйся, светило заблуждших.

Радуйся, благочестия великий учителю.

Радуйся, апостолов святых приемниче.

Радуйся, уста богодвижимая спасительного учения.

Радуйся, око безмятежное светлосиянная души.

Радуйся, яко источаеши сладость спасения.

Радуйся, яко изсушаеши яд злобы.

Радуйся, образе пастырей богоизваянный.

Радуйся, правило святых кротости.

Радуйся, Христа ревнителю и служителю.

Радуйся, света небеснаго зрителю.

Радуйся, всемудре Фотие!

Кондак 5

Богоглаголивым языком твоим Рима древнего предстоятеля Николая заблуждение, мудре, обличил еси, Фотие, и того гордыню до земли смирил еси: не разуме бо безумный право Троице взывати: Аллилуиа.

Икос 5

Священно направляя к пажитем спасения Христову непорочную церковь, гонения подъял еси лютая и от стада твоего нужно разлучен

был еси. Но верний твой, святе не престаша
взывающе:

Радуйся, великий во иерарсех.

Радуйся, богодухновенный в
пастыреначальницех.

Радуйся, терпения столпе непоколебимый.

Радуйся, благочестивых пение немолчное.

Радуйся, солнце многосветлое озаряющее всю
землю.

Радуйся, мечу обоюду острый посецающий
папскую гордыню.

Радуйся, яко подъял еси гонения и озлобления.

Радуйся, яко обличаеши гонителей лики.

Радуйся, пастырю всех пастырей
предъизбранный.

Радуйся, верных всех защитниче.

Радуйся, Христов божественный таинниче.

Радуйся, наш заступниче и избавителю.

Радуйся, всемудре Фотие!

Кондак 6

Глашатай сый благочестия, православно проповедуеши яко Дух Всесвятый, отче, исходит от Отца, и латинское злословие обличил еси, верных научил еси, Фотие, пети Троице: Аллилуиа.

Икос 6

Возсияв на востоце яко светлая денница, озаряеши всю поднебесную и западный мрак, торжествуеши же светоносными догматы, иерарше всечудне, слыша от нас таковая:

Радуйся, востока великое светило.

Радуйся, всех верных почитание.

Радуйся, западного омрачения обличителю.

Радуйся, Божественного светозарения причастниче.

Радуйся, угле, попяляяй всякую латинскую лесь.

Радуйся, светильниче просвещаяй всех Благодатию Троическою.

Радуйся, яко Троицу Святую проповедуеши.

Радуйся, яко латинян заблуждение отсецаеши.

Радуйся, света невещественного исполненный.
Радуйся, многими благодатьми изобилующий.
Радуйся, Божиих дарований изъявителю.
Радуйся, мудрый и славный богоявителю.
Радуйся, всемудре Фотие!

Кондак 7

Таиннописец догматов православных сый,
обличаеши манихеев заблуждение и
иконоборцев крепость, возгремев словесы
твоими, Фотие священноявленник
божественный церкви явился еси вопия:
Аллилуиа.

Икос 7

За законы церкви и уставы святых мудре
поборствуя, богоглаголиве, латинян нашествие
претерпел еси крепчайше, Фотие. Сего ради
кротости твоей дивящися, взываем:

Радуйся, латинян поразителю.
Радуйся, прелести низложителю.
Радуйся, апостолов ревности подражаяй.
Радуйся, злославных дерзость превращаяй.

Радуйся, органе богодухновенный Божия
мудрости.

Радуйся, мечу огнеобразный на прелесть
вражию.

Радуйся, мироположнице добродетелей
небесных.

Радуйся, столпописание борений святых.

Радуйся, источниче вод благодатных.

Радуйся, заре вышняго сияния.

Радуйся, живота священного проведче.

Радуйся, верных истинный наказателю.

Радуйся, всемудре Фотие!

Кондак 8

Удивляет сердца верных, богоглаголиве,
богатство многия твоя мудрости, сквозь всего бо
добраго прошед, приятелище добродетели
показался еси, Фотие, велие имя, световодяй
взывающих: Аллилуйя.

Икос 8

Весь исполнь покоя, образом являяй души твоея
величие, отче, сонмищу гонителей на тя

сошедшихся предстал еси, верных же удивил еси Божественным нравом твоим, зовущих:

Радуйся, благодати строителю.

Радуйся, богослове изряднейший.

Радуйся, ярость безсловеснейшую понесый.

Радуйся, силу неборимую явивый.

Радуйся, образе кротости и любви сокровище.

Радуйся, Духа Святыне и душ световодителю.

Радуйся, яко предстал еси неправедному соборищу.

Радуйся, яко поучаеши словом благодати.

Радуйся, врагов безумия не убоявыйся.

Радуйся, верных разум облиставаяй.

Радуйся, судей неправедных посрамление.

Радуйся, победо наша богодарованная.

Радуйся, всемудре Фотие!

Кондак 9

Духом Святым прошед житие, понесл еси гонения мужественно и сообразен страстем

Христовым быв, священнейше Фотие, того Божественней славе приобщился еси, зовый: Аллилуйя.

Икос 9

Ветия сый богоглаголивый, слова спасительная, яко мудрый пастыреначальник, предложил еси пастве твоей словесней и всей церкви, Фотие: светильник всем явился еси, просвещая зовущих:

Радуйся, всея церкви светило.

Радуйся, душотленныя лести сожжение.

Радуйся, многочудне Фотие великий.

Радуйся, пастырю священнейший и славный.

Радуйся, поточе происходяй из Эдема таинственного.

Радуйся, стено неборимая церкви честная.

Радуйся, яко возсияваеши небесное ведение.

Радуйся, яко подаеши здравие ты просящим.

Радуйся, верных священное веселие.

Радуйся, врагов всесовершенное поражение.

Радуйся, имже латиняне умолкают.

Радуйся, к немуже вернии взывают.

Радуйся, всемудре Фотие!

Кондак 10

Тя незаходимое сияние Спас всяческих яко свет церкви паки возведе яко благ, просвещати, путеводствовати и земледелати, Фотие, богомудры словом твоим Господеви поющих: Аллилуиа.

Икос 10

Всеумудрых словес твоих и учений твоих Божественных сил никакоже противовещати вси западнии мудрецы могут, иже языком хульным своим на тя, отче, движут. Но мы верно тебе зовем:

Радуйся, всесветлая деннице.

Радуйся, величайший богоглагольниче.

Радуйся, мудрости луже благоуханнейший.

Радуйся, болящаго наказания обличителю.

Радуйся, сокровищехранительнице даров Божественных.

Радуйся, священный алавастрем смыслов возвышенных.

Радуйся, яко всеумудре люди твоя пасеши.
Радуйся, яко вещество ересей попаляеши.
Радуйся, яко огонь Божественный возжигаети.
Радуйся, врага злейшаго поражаяй.
Радуйся, мудрых священнейшая славо.
Радуйся, верных благодарованная крепосте.
Радуйся, всеумудре Фотие!

Кондак 11

Песньми Церковь вся Святая поет тя
священными, иерарше, по долгу, Фотие мудре,
яко тобою от злейших ересей избавися
Божественною Благодатию и
пастыреначальнику поет: Аллилуиа.

Икос 11

Света твоего, отче трепещет мрака предстатель,
светоподательным же твоим званием полчище
ересей яко огнем гонимо исчезает.
Благочестивии же, Фотие радостию зовем ти:
Радуйся, богодухновенный первосвященниче.
Радуйся, ко Господу наш предстателю.
Радуйся, лжи попяляй плевелы.

Радуйся, злобы обращаяй беснования.

Радуйся, православныя веры угле искрящийся.

Радуйся, Божественных преданий звездо
лучистая.

Радуйся, папского безумия обличителю.

Радуйся, таинственныя радости подателю.

Радуйся, Христов служителю теплейший.

Радуйся, пастырю пастырей мудрейший.

Радуйся, верных озаряяй смыслы.

Радуйся, рог врагов побеждаяй.

Радуйся, всемудре Фотие!

Кондак 12

Радуйся к небесным переселился еси обителем и
зриши несредственно Всесвятая Троицы паче
слова блистания, богодухновенне, причастием
обожаем, и поя Фотие, непрестанно: Аллилуиа.

Икос 12

Поюще твоя подвиги, Фотие иерарше,
припадаем тебе со многим умилением, но отче
отцев основание, даждь и мне каплю от твоея

мудрости, просвещая сердце мое, яко да
непрестанно взываю ти:

Радуйся, великий первоиерарше.

Радуйся, всех верных предстателю.

Радуйся, православных христиан осияние.

Радуйся, богоглаголивых отцев украшение.

Радуйся, Церкви Христовы державо и
утверждение.

Радуйся, вражеския лести крепчайший
низложителю.

Радуйся, православия озаряяй красоту.

Радуйся, злословия низлагаяй заблуждения.

Радуйся, имже от мрака избавлюся.

Радуйся, имже света исполнюся.

Радуйся, верных ко Христу ходатаю.

Радуйся, и мой светодателю и избавителю.

Радуйся, всемудре Фотие!

Кондак 13

О, предивный отче Фотие иерарше, всея Церкви красото, песенная моления милостивно прием, испроси нам света Божественного и небеснаго, яко да Троице Святей вопием: Аллилуиа, Аллилуиа, Аллилуиа.

Этот кондак читается трижды, затем икос 1-й и кондак 1-й.

Молитва

О, всеумудре и преизрядне архиерею равноапостольный просветителю земли болгарския, светлогласная гусли Божественного Духа, святителю отче Фотие к тебе ныне притекаем, и малое сие моление тебе умиленно приносим. Услыши нас, смиренных чад твоих, яви предстательство твое о нас к Вышнему, тепле Того умоляя да простит ны рабы своя, да отверзет нам двери милосердия своего. Несмы бо достойни, ниже довольно зрети высоту небесную от множества грехов наших сляцаеми. Но аще и тажце согрешихом и николиже воли Создателя нашего сотворихом, ни сохранихом повелений его, обаче не обратихомся к богу иному, ниже прострохом руце к богу чуждему. Преклоняюще колена сокрушенна и смиренна сердца нашего зиждителю своему и твоего

отеческаго заступления к Нему паки просим: предстательствуй, угодниче Христов, светлопозлащенный Фотие, стране нашей и Церкви Болгарстей, некогда потом трудов твоих напаяемой, ныне же горькими соблазны снедаемой. Помози нам, святче Божий, да не погибнем со беззаконии нашими, избави нас от всякого зла и от всякия вещи сопротивныя, управи ум наш и укрепи сердца наша в православней вере, в нейже твоим предстательством и ходатайством ни ранами, ни прещением, ни коим гневом от Создателя своего умаленны будем. Молитимся, пастырю добрый, волки тяжки от словеснаго стада Христова отгоняй, латинскую гордыню, аки бы смирением себе покрывающую, и лестне о любви глаголющую, на Церковь же Соборную крепце востающую, якоже древле посецы. Нас же от еретических ухищрений добре сохрани и истинствовати в любви настави. Всякому доброделанию, наипаче же покаянию слезному о гресех нас научи: яко да по исходе нашем в тамошний мир омофором молит твоих покрываеми и Матерним заступлением Преблагословенныя Владычицы нашея сохрани, избавимся воздушных мытарств и вечнаго мучения, да с тобою и со всеми всегда прославляем Всепетое имя Отца и Сына и

Святаго Духа, и ныне и присно и в безконечныя
веки веков, Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
НЕБО